



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 22
Nobyembre 21, 2010
www.philippinerevolution.net

Editoryal

Ang pakikibaka sa PAL at paglaban ng mga manggagawang Pilipino

Makatarungan para sa mga manggagawa ng Philippine Air Lines (PAL) na puspulang labanan ang planong sipain ang halos 3,000 regular na manggagawa sa kumpanya at palitan sila ng mga de-ahensyang manggagawang kontraktwal. Ang pakikibaka laban sa iskemang

ito ng *outsourcing* (pagkokontrata ng trabaho sa labas ng kumpanya) ay malawak at lubos na sinusuportahan ng uring manggagawa at masang anakpawis.

Hindi lamang ang kabuhayan ng mga manggagawa ng PAL at kanilang mga pamilya ang naka-

salalay sa pakikibakang ito. Lalupa't kinatigan ng Department of Labor and Employment (DOLE) ang mga balak ng PAL, asahang lalo pang lalakas ang loob ng malalaking kapitalista na pag-ibayuhin ang sistema ng *outsourcing*.

Nakadugtong ang pakikibakang ito sa laban ng mga manggagawa sa patakaran ng "pleksibilisasyon" ng paggawa na ipinataw ng imperyalismo noon pang dekada 1990. Nitong nakaraang dalawang dekada, tuluy-tuloy na sumidhi ang pagsasamantala sa mga manggagawang Pilipino sa pamamagitan ng iba't ibang anyo ng "pleksibilisasyon" ng paggawa, katulad ng kaswalisasyon at kontraktwalisasyon at ng ngayo'y luma-



**Mga tampok sa
isyung ito...**

Napipintong welga sa
PAL

PAHINA 3

Kilalang syentista,
pinatay ng militar sa
Leyte

PAHINA 7

Mga pagbabago sa
disenyo ng *Ang Bayan*

PAHINA 14

laganap na sistema ng *outsourcing*. Ang mga ito'y istandard nang sistema ng pag-eempleyo sa mga manggagawa.

Naisasakatuparan ang mga ito gamit ang matinding panlilinlang, pambabroso at panggigipit. Pwersahan ang pagpaparetiro at iba pang paraan upang mapalayas at mapalitan ang mga regular na manggagawa.

Mula sa 15% noong maagang bahagi ng dekada 1990, umaabot na ngayon sa halos 80% ng mga manggagawa sa bansa ang kaswal at kontraktwal. Malawakan itong isinasakatuparan pangunahin ng malalaking kapitalistang kumprador, tulad ni Lucio Tan na may-ari ng PAL. Noong 1999, sinipa nito ang 5,000 sa 12,500 manggagawa at umupa ng kapalit na mga kontraktwal sa pamamagitan ng kasabwat na mga ahensya. Kapag magtagumpay ang pinakahuling planong palitan ang may 3,000 pang regular na manggagawa, masasaklaw na ng *outsourcing* ang hanggang 70% ng pwersa

sa paggawa ng PAL.

Ipinatutupad din ang *outsourcing* sa iba pang empresang pag-aari ni Lucio Tan. Sa Victorias Milling Corporation, na mayoryang pag-aari ni Tan, halos buong pwersa ng paggawa ay naka-*outsource* na. Sa Fortune Tobacco, balak ding sisantehin ang 2,400 manggagawa at palitan ng mga kontraktwal.


Mahigit 70% ng mga empresa sa Pilipinas ang nag-eempleyo ng higit nang maraming kontraktwal kaysa regular na mga manggagawa. Kabilang dito ang pinakamalalaki, tulad ng San Miguel Corporation (96%), SM Shoemart (94%), Dole Philippines (77%), PLDT (60%) at iba pa. Tumampok din kamakailan ang kaso ng ABS-CBN Corporation matapos sipain ng kumpanya ang halos 100 manggagawang kontraktwal na

ineempleyo nito sa pamamagitan ng sarili nitong ahensyang ABS-CBN Internal Job Market. Halos 100% ng mga ineempleyo sa ipinagmamalaking mga *call center* (na siyang may pinakamalaking bilang ng naka-*outsource* na trabaho ng mga dayuhang kumpanya) ay kontraktwal, gayundin sa mga *fastfood chain* tulad ng Jollibee.

Sa pamamagitan ng malawakang pag-eempleyo ng mga manggagawang kontraktwal, nagagawang patindihin nang husto ang pagsasamantala upang ibayong palakihin pa ang super-tubo ng mga kapitalista. Di hamak na mas mababa ang pasahod sa kanila kumpara sa mga regular sa parehong trabaho. Karaniwan na kulang pa ito sa minimum ayon sa batas. Ipinagkakait sa kanila ang mga karapatan at benepisyong tinatamasa ng mga regular na manggagawa.

Kung tutuusin, halos wala nang kinikilalang obligasyon ang mga kapitalista sa mga manggagawang kontraktwal. Laganap ang pagpapatrabaho sa mga kontraktwal nang higit sa walong oras bawat araw nang wala nang dagdag para sa obertaym o mga araw ng bakasyon. Walang sahod kapag hindi nakapapasok, walang medikal at iba pang benepisyo. Malaking bilang pa ng mga kontraktwal ay ineempleyo nang walang naka-sulat na kontrata, kaya karaniwang pinagtatrabaho nang higit na mas mabigat sa inaasahan,



	
Taon XLI Blg. 22 Nobyembre 21, 2010	
<p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p>www.philippinerevolution.net</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa:</p> <p>angbayan@yahoo.com</p>	
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	
<h2>Nilalaman</h2>	
Editorial	1
Pakikibaka sa PAL	1
Napipintong welga sa PAL	3
Mga welga sa iba't ibang kumpanya	5
Mga estudyante, nakaambang magwelga	6
Pananalanta ng pasistang estado	7
Kilalang syentista, pinatay ng militar	7
Leonardo Co, pinarangalan ng PKP	7
Aquino: Pinakamalaking bugaw	8
Ka RD: Huwarang rebolusyonaryo	9
Mga drayber, nagprotesta	10
Palayain ang Morong 43!	11
Matatagumpay na TO	11
7 armas, nasamsam ng BHB sa Davao del Sur	11
Kasinungalingan ng militar sa Negros	12
Pagmimina at pagtotroso, tinututulan	12
Ika-6 na anibersaryo ng Luisita massacre	13
Bagong oplan ng AFP	13
Mas malalaking letra, mas mahabang papel	14
Sa ibayong dagat	14
Pulong ng G20, sinalubong ng kilos-protesta	14

at sa maraming kaso ay labag pa sa batas. Madali silang sisantehin sa anumang maliit na dahilan nang hindi nabibigyan ng pagkakataong maipagtanggol ang kanilang panig.

Ang mababang pasahod sa mga manggagawang kontraktwal ay lalong humihila pababa

sa halaga ng lakas-paggawa sa Pilipinas. Sa harap ng malawakang disempleyo at desperasyon na makapasok sa anumang trabaho, karaniwang napipilitan ang mga manggagawang kontraktwal na lunukin na lamang ang mababang sahod at ibang pang mapang-aping kundisyon

sa kanilang panandaliang empleyo.

Ang paghadlang at paglum-po sa mga unyon ay kabilang sa mga pangunahing layunin ng mga imperyalista at kakutsabilang malalaking kapitalistang kumprador sa pagsasakatuparan ng malawakang “pleksibilisa-

Napipintong welga sa PAL

Naghapag ng pangalawang abiso ng pagwewelga ang PAL Employees Association (PALEA) laban sa maneydsment ng PAL noong Nobyembre 5. Ginawa nila ang desisyong ito matapos paisha-isang gipitin ng kumpanya ang mga kasapi ng unyon para tanggapin ang iniaalok na *separation pay* at pumayag na masipapa at maging kontraktwal o kaya mapalitan ng mga bagong kontraktwal.

Sagot din ito ng unyon sa pagkatig ng DOLE sa planong pagsibak ng kumpanya sa halos 3,000 regular na manggagawa at pagpapalit sa kanila ng mga kontraktwal, sa ngalan ng pagtitipid.

Bahagi ng planong pagtitipid ang *outsourcing* ng tatlong umano’y di esensyal (*non-core*) na operasyon ng kumpanya. Ang mga ito ay ang *airport services department* na may 2,000 manggagawa, *inflight catering service* na may 1,000 manggagawa at *reservation call center* na may 172 manggagawa. Ang mga manggagawa sa mga departamentong ito ay pito hanggang 30 taon nang nagsisilbi sa kumpanya.

Plano ng PAL na ibenta na rin ang mga operasyong medikal at *information technology* ng kumpanya at kontratahin na lamang ang mga operasyon ng mga ito sa ibang ahensya.

Bilang pampalubag-loob, sinasabi ng kumpanya na ang mga matatanggal sa trabaho ay maaaring iempleyo ng mga ahensyang kokontratahin ng PAL para sa mga kinakailangang serbisyong di na direktang nakapaloob sa PAL: ang ePLDT (para sa *call center*), SkyKitchen (para sa *catering*) at SkyServices (para sa *airport services*). Magkagayon man, tuluyan nang ma-

wawala ang katiyakan ng mga manggagawa sa kanilang trabaho. Maoobliga silang tumanggap ng mas mababang sahod, mawawalan ng maraming benepisyo at manganganib na sipain anumang oras.

Nag-alok ang PAL ng P2.5 bilyong minsanang “benepisyo sa pagreretiro” para sa sisipain nitong mga manggagawa. Lubhang maliit ito kung ikukumpara sa P3.87 bilyon kada taon na matitipid ng PAL sa pag-empleyo ng mga kontraktwal na manggagawa na sasahod ng mas mababa at di na tatanggap ng dating mga benepisyo.

Noong 2000, tinanggal sa trabaho ang mga manggagawa ng *maintenance and engineering department* ng PAL na binili ng Lufthansa Technik Philippines.

Idinadahilan ng PAL ang pangangailangang magtipid para maisalba ang kumpanya at ang natitirang trabaho. Pero ang tunay na nasalikod nito ay ang pambabarat sa mga empleyado, pagwasak sa kanilang unyon at pag-iwas sa panibagong *collective bargaining agreement* (CBA).

Dati nang ginamit ng may-ari ng PAL na si Lucio Tan ang linyang “nalulugi ang kumpanya” para ipataw ang 10-taong moratorium sa CBA noong 1998 na kinatigan ng DOLE. Nagtapos na ito noong 2008 pero hanggang ngayon ay tumatanggi pa rin ang kumpanya na umupo para sa pagbubuo ng bagong CBA.

Bago ito, naudlot ang itinakdang welga ng mga *flight attendant* at *cabin crew* noong Oktubre nang iutos ni Benigno Aquino III na ipailalim sa DOLE ang sigalot.

AB

syon" sa paggawa. Bagamat illegal, karaniwang bahagi ng kontrata ang probisyong di paglahok sa unyon. Nakasasagka rin sa pagpapalahok ng mga kontraktwal ang limitadong panahon (karaniwa'y limang buwan lamang) ng kanilang empleyo.

Matindi na ang dagok sa pag-uunyon ng mga manggagawa ang kontraktwalisasyon ng paggawa. Matapos ang halos dalawang dekada ng "pleksibilisasyon" sa paggawa, nasa humigit-kumulang 5% na lamang ng mga manggagawa ang organisado sa mga unyon (mula 15% noong 1995). Dagdag pa, umaabot na lamang sa 220,000 manggagawa (wala pang 1% ng kabuuang pwersa sa paggawa) ang saklaw ng mga Collective Bargaining Agreement (CBA) o kasunduan sa pagitan ng unyon at kapitalista kaugnay ng sahod at iba pang interes ng mga manggagawa.

Sa pagsasakatuparan ng malawakang "pleksibilisasyon" ng paggawa at paglumpo sa mga unyon, halos buong-layang pinipiga ang mga manggagawang Pilipino sa pamamagitan ng pinakamatitinding anyo ng pagsasamantala sa lakas-paggawa at walang habas na paglapastangan sa kanilang mga karapatan. Marami sa mga naipagtanggap sa mga pakikibaka ng uring manggagawa nitong nakaraang dantaon ay lansakan nang sinasagasaan, nilalabag at bina-

baligtad. Nitong nakaraang dalawang dekada, malaking bahagi ng masang manggagawa sa bansa ang bumagsak na sa pagiging mala-manggagawa.

Ang gayong pagsasadlak sa mga manggagawang Pilipino ay sadyang binigyang-daan ng mismong papet na gubyrerno ng Pilipinas, sa utos ng imperyalistang amo. Ang National Employment Plan (NEP) na binuo noon pang panahon ni Corazon Aquino ay tahasang naghikayat sa kontraktwalisasyon bilang paraan umano para maitaas ang kakayahang ng mga negosyo sa kompetisyon. Pinagtibay pang lalo ito ng iba't ibang kautusan ng mga sumunod na papet na gubyrerno na nagbibigay ng lisensya at paghikayat sa iba't ibang anyo ng "pleksibilisasyon" sa paggawa.

Kabilang ito sa mga susing patakaran na itinutulak ng imperyalismo sa balangkas ng globalisasyon ng "malayang kalakalan." Ipinatutupad ang mga ito kaalinsabay ng mga patakaran ng liberalisasyon, denasyunalisasyon, pribatisasyon at deregulasyon. Layunin ng mga ito ang pagbaklas sa mga proteksyon sa pambansang ekonomya at pagbibigay-laya sa mga dayuhang monopolyong kapitalista na mamuhunan ng sobrang kapital, magtambak ng sobrang kalakal, huthutin ang pambansang kayamanan at rekursong at samantalahin ang murang lakas-pag-

gawa sa mga malakolonya.

Sa pamamagitan ng "pleksibilisasyon" sa paggawa, pinagkokompetisyon ang mga malakolonya sa pag-alok ng pinakamura at pinakasupil na mga manggagawa upang akitin ang mga dayuhang malalaking kapitalistang mamumuhunan. Isinasakatuparan ngayon ang internasyunal na kontraktwalisasyon. Baha-bahagi ng produksyon ng mga monopolyo kapitalistang kumpanya ay naka-outsource sa mga kontraktwal na manggagawa sa mga malakolonya na tumatanggap ng mas murang sahod. Ang paglaganap ng mga *call center* sa Pilipinas ay bahagi nito.

Ang pakikibaka laban sa kontraktwalisasyon ng paggawa at iba't ibang anyo ng "pleksibilisasyon" ay nakahanay ngayon sa mga pangunahing laban ng mga manggagawa sa bansa. Dapat buuin ang malawakang pagkakaisa ng sambayanang Pilipino upang labanan at mapahinto ang mapang-api at mapagsamantalang sistema ng kontraktwalisasyon. Katulad ng paglaban ngayon ng mga manggagawa sa PAL, dapat tuligsain ng lahat ng unyon at samahan ng mga manggagawa at anakpawis ang paglaganap ng *outsourcing* at kontraktwalisasyon ng mga trabaho sa iba't ibang industriya at kumpanya at tutulan ang patakaran ng mga imperyalista at papet na gubyrerno na itulak ito.

Kaalinsabay nito, dapat magpunyagi sa pag-oorganisa ng mga manggagawa—regular man o kontraktwal—sa mga unyon at iba't ibang anyo ng mga samahan o kilusan, kapwa sa



mga empresang pinagtatrabahuhan, sa mga ahensyang nagsu-suplay ng mga kontraktwal o sa mga komunidad. Dapat ipagtanggol ng mga ito ang kapakanan at mga karapatan ng mga manggagawa, kabilang ang paggigiit ng karagdagang sahod at regularisasyon ng kanilang empleyo.

Napakahalagang makipagkaisa at sumuporta ang malawak na masang anakpawis, ang lahat ng mga progresibong pwersa at buong sambayanang Pilipino sa mahirap na pakikibaka ng uring manggagawa laban sa “pleksibilisasyon” ng paggawa at iba pang mga neoliberal na patakaran sa ekonomya. Dapat pandayin at palawakin ang landas ng pakikibaka para sa disentang trabaho, nakabubuhay na sahod at karapatan ng mga manggagawa, at pakilusin din dito ang masang anakpawis na walang trabaho pati na rin ang ibang mga demokratikong sektor na sumusuporta sa interes ng mga manggagawa.

Ang pakikibaka para sa disentang trabaho at karagdagang sahod ay mahigpit na nakakawing sa panawagan at pakikibaka para sa tunay na reporma sa lupa, pambansang industriyalisasyon at para sa ekonomyang maunlad at nakatatayo sa sarili. Kaya dapat puspusan ding kumilos ang mga rebolusyonaryong pwersa, lider-manggagawa at pambansa-demokratikong aktibista para imulat ang malawak na masa at pamunuan ang kanilang mga paglaban tungo sa landas ng rebolusyonaryong pakikibaka at pagkamit ng mga saligang pagbabago sa lipunan. **AB**

Welga, nakaamba sa Lepanto

Naghapag ng abiso ng pagwewelga ang mga myembro ng Lepanto Employees Union-National Federation of Labor Unions-Kilusang Mayo Uno at Lepanto Security Union (LSU) noong Nobyembre 12 sa National Conciliation and Mediation Board makaraang sipain ang 140 manggagawa ng Lepanto Consolidated Mining Company. Inakusahan ng dalawang unyon ang kumpanya ng pambubuwag ng unyon at di makatarungang pagtrato sa mga manggagawa.

Kabilang sa mga sinisante ang pitong namumunong upisyal ng dalawang unyon, 116 pang kasapi ng unyon at iba pang regular na manggagawa. Ikinatwiran ng kumpanya ang di epi-syenteng trabaho ng mga sinisante. Taktika ng kumpanya ang pagsibak sa kanila para lumpuhin ang mga unyon at sa gayo’y mapahina ang kakayahan ng mga manggagawa sa nalalapit na negosasyon para sa *collective bargaining agreement* (CBA) sa pagitan ng kumpanya at mga manggagawa. Balak ding palitan na lamang ng kontraktwal ang mga sinisante.

Inirerekلامo rin ng mga manggagawa ang mga sahod nilang di nila natanggap (na umaabot na sa ₱542 milyon) at ang di pagre-*remi*t ng kumpanya sa mga kaltas sa mga manggagawa para sa Social Security System at PAGIBIG. Bunga nito ay hindi makakuha ng benepisyo ang mga manggagawa. **AB**

Welga sa Advan, Bureau of Customs

Naglunsad ng apat na araw na welga ang mga manggagawa ng Bluestar Manufacturing and Marketing Corporation (BMMC) sa Tunasan, Muntinlupa City. Ang BMMC ang tagagawa ng Advan Shoes and Rainboots. Inilunsad ang welga ng Bluestar Workers’ Labor Union (BWLU) dakong alas-5 ng umaga noong Nobyembre 15. Itinirik ang piketlayn na tinauhan ng 108 manggagawa o halos kalahati ng kabuuang bilang ng manggagawa ng kumpanya.

Dahil sa welga, napilitan ang maneydsment ng BMMC na kilalanin ang unyon, tupdin ang kanilang CBA at harapin ang isyu ng *sexual harassment* at iba pang di makatarungang pagtrato sa mga manggagawa. Nauna nang magwelga ang mga manggagawa noong 2008 dahil sa nabanggit na mga isyu.

Samantala, nagbantang magwelga ang Bureau of Customs Employees Association (BOCEA) bilang protesta sa hindi pagbayad sa obertaym ng mga empleyado ng Bureau of Customs sa Ninoy Aquino International Airport. Ayon sa BOCEA, umaabot na sa ₱500 milyon ang dapat ibigay sa mga empleyado 14 na buwan na ang nakararaan. **AB**

Mga estudyante, nakaambang magwelga

Nagsimula na ang serye ng mga pagkilos ng kabataan at estudyante upang tutulan ang lumalaking kaltas sa badyet sa mga pampublikong unibersidad at kolehiyo (*state colleges and universities* o SCU). Inilulunsad ng mga progresibong organisasyon ang “November Strike” upang iparating sa rehimen ni Benigno Aquino III ang kanilang galit sa malaking kaltas ng badyet sa SCU.

Sa University of the Philippines sa Diliman, Quezon City (UP-Diliman), sinimulan ang pagkilos noong Nobyembre 12 sa pamamagitan ng paglagda sa isang manipesto na nagpapahayag ng pagtutol sa ₱1.39 bilyon kaltas sa badyet, ang pinakamalaki sa kasaysayan ng UP. Pumirma sa manipesto ang mga estudyante, guro at empleyado. Naglunsad din sila ng rali kasabay ng pagpupulong ng Board of Regents noong Nobyembre 19 upang hamunin ang susunod na magiging presidente ng paman-tasan na makiisa sa laban sa pagkaltas sa badyet. Kinansela ang pagpili at iniusod ito sa Disyembre 3. Nakatakda namang maglunsad ang mga estudyante ng welga sa darating na Nobyembre 25-26 sa iba't ibang kampus ng UP.

Nagkaroon din ng pagkilos ang mga estudyante ng Cebu City sa tanggapan ng Commission on Higher Education-Cebu noong Nobyembre 9. Dismayado sila dahil ang ini-laang badyet sa edukasyon ay hindi man lamang umabot sa kalahati ng pamantayang itinakda ng United Nations Educational, Sci-


entific and Cultural Organization (UNESCO). Ayon sa UNESCO, dapat maglaan ang mga guberno ng 6% ng *gross domestic product* (GDP o kabuuang produksyon sa loob ng bansa) para sa edukasyon. Ang kasalukuyang badyet pang-edukasyon ng Pilipinas ay mas mababa pa sa 3% ng GDP.

Nagpiket naman noong Nobyembre 11 ang mga estudyante ng University of the Philippines-Visayas (UP-V) sa kanilang kampus sa Miag-ao, Iloilo upang maggiit ng mas mataas na badyet sa UP. Sa UP-Manila, nagpiket ang mga estudyante noong Nobyembre 18 at nagsuot ng maiiksing “shorts” bilang simbolo ng papaliit na badyet sa edukasyon. Noong Nobyembre 17, ang mga kaltas sa badyet pang-edukasyon ang panguna-

hing isyung dinala ng mga estudyante nang gunitain nila sa isang pagkilos sa Mendiola ang International Students Day.

Sa Polytechnic University of the Philippines (PUP), kumilos ang mahigit 2,000 estudyante sa loob ng kampus sa Sta. Mesa, Maynila noong Nobyembre 18. Nakiisa sa kanila ang mga guro, empleyado at maging ang presidente ng unibersidad sa pagtutol sa pagpapaliit ng badyet ng PUP sa ₱672 milyon na lamang sa halip na ang buong kinakailangang ₱2 bilyon badyet. Tinutulan din nila ang ₱23.4 milyong kaltas sa badyet sa pagpapaayos ng mga klasrum, gusali at iba pang pasilidad ng unibersidad. Idinugtong nila ang mga ito sa malawak na pagkilos ngayon sa mga unibersidad laban sa malaking kaltas sa badyet ng mga SCU sa buong bansa. Kinabukasan, naglunsad muli ng kilos-protesta sa PUP. Umabot sa 3,000 ang mga lumahok na estudyante, guro, kawani at mga dyanitor ng unibersidad. Inia-nunsyo nilang maglulunsad sila ng welga ng buong PUP sa darating na linggo.

Nakatakda ang malaking pagkilos ng mga estudyante, guro, kawani at mga upisyal ng mga SCU at iba pang sumusuporta sa protesta nila sa darating na Disyembre 1 kasabay ng pagdinig ng Senado at Kongreso hinggil sa badyet para sa edukasyon. **AB**



Kilalang syentista, pinatay ng militar sa Leyte

Isang bantog na syentista at dalawa niyang kasamahan ang pinaslang ng militar sa Leyte habang isang lider-unionista at isang aktibistang magsasaka sa Southern Tagalog ang pinatay nitong Nobyembre.

Nobyembre 15. Binaril ng mga elemento ng 19th IB si Leonardo Co, kilalang *plant taxonomist* (dalubhasa sa klasipikasyon ng mga halaman) at dalawang myembro ng kanyang tim na sina Policarpio Balute at Roniño Gibe. Dalawa pa nilang kasamahan ang nakatakas habang tatlong estudyanteng nagsasanay ang nawawala pa rin hanggang ngayon.

Ang walo kataong tim nina Co ay isang linggo nang nasa magubat na bahagi ng Sityo Upper Malihao, Barangay Lim-ao, Kananga, Leyte para mangalap ng mga binhi ng mga punong kahoy na nanganganib nang maubos. Ito ay para sa proyektong reporestasyon ng Energy Development Corp. (EDC).

Pinagbabaril ng mga sundalo ng guberno sina Co nang hindi man lamang inaalam kung sino sila. Mahigit 15 minuto silang walang pakundangang nirapido at pinasabugan pa ng mga granada. Ito'y kahit koordinado ang aktibidad nina Co sa militar dahil ang lugar na pinuntahan nila ay malapit lang sa kampo ng isang yunit ng 19th IB, nakapalilalim sa kanilang ispesyal na yunit ng CAFGU, at saklaw ng regular na patrolya ng 19th IB.

Para pagtakpan ang kanilang

krimen, sinabi ng militar na rumeresponde raw ang 19th IB sa ulat ng EDC na mayroon daw mga namataang gerilya ng BHB sa lugar. Natamaan daw sina Co nang magpalitan ng putok ang mga sundalo at Pulang mandirigma.

Pinabulaanan ng EDC na may itinawag silang gayong ulat sa militar. Ayon naman sa mga nakaligtas na kasamahan ni Co, wala silang nakitang ibang ar-

madong grupo sa lugar. Anila, sa panig lamang ng militar nanggaling ang mga putok at walang anumang putok mula sa iba pang panig.

Nobyembre 12. Isang lider-manggagawa ang pinatay ng mga armadong lalaking nakamotorsiklo sa Laguna. Kagagaling lamang ni Carlos Rodriguez, 41 anyos, sa isang pulong ng mga lider-union at pauwi na sana nang pagbabarilin ng mga salarin sa Barangay Halang, Calamba. Apat na tama ng bala ang kanyang tinamo—dalawa sa likod, isa sa braso at isa sa leeg. Si Rodriguez ay pinuno ng Naggakaisang Lakas ng Manggagawa ng Calamba Water District at upisyal ng COURAGE.

Si Rodriguez ang ika-22 bik-

Leonardo Co, pinarangalan ng PKP

Pinarangalan ng PKP si Leonardo Co at ang kanyang malaking kontribusyon sa pagkilala sa mga lokal na halaman at sa pakinabang ng mga ito sa panggagamot. Mula dekada 1980 hanggang siya'y paslangin ng militar, nanguna si Co sa masusing pagbubuo ng kauna-unahang awtoritatibong tinipong impormasyon hinggil sa mga halamang gamot sa Pilipinas. Ang tinipong impormasyong ito ay nagsilbing mahalagang sanggunian ng mga rebolusyonaryo at progresibong manggagawang pangkalusugan sa pagbibigay ng mga pagsasanay at serbisyo sa masa, laluna sa kanayunan.

Si Co ang isa sa mga nagtatag ng Community Health, Education, Services and Training in the Cordillera Region (Chestcore) noong 1981. Naging makabuluhan ang gawain ng organisasyong ito sa mga komunidad ng mga pambansang minorya sa Cordillera at iba pang lugar at sa pagsisistematisa ng kaalaman ng masa sa rehiyon hinggil sa mga halamang gamot para sa saligang pangangalaga sa kalusugan. Naisadokumento nito ang 122 halamang gamot sa rehiyon kabilang ang syentipiko at karaniwang pangalan ng mga ito, pati na ang paglalarawan, taglay na sustansya at bisa nito sa panggagamot. **AB**



tima ng ekstrahudisyal na pagpatay sa ilalim ng administrasyong Aquino. Aktibo siya sa pagtataguyod ng mga karapatan ng mga manggagawa sa Southern Luzon. Inorganisa niya ang Southern Luzon Forum tungkol sa mga isyu ng mga empleyado ng gubyrerno at ang asembliya ng grupong WATER-Southern Luzon. Ang WATER ay koalisyon ng mga empleyado sa mga *water district*.

Mariing kinundena ng Karapatan ang pagpatay kay Rodriguez. Ayon sa Karapatan, isang aktibista bawat linggo ang pinaspalang sa ilalim ng bagong rehimen.

Nobyembre 7. Hinarang at pinaslang sa Barangay Caybunga, Balayan, Batangas ng dalawang armadong lalaking sakay ng motorsiklo si Ireneo Rodriguez, 38 anyos, myembro ng Samahan ng mga Magbubukid sa Batangas (SAMBAT). Si Rodriguez ay residente ng Barangay Coral ni Lopez, Calaca, Batangas.

Agosto hanggang sa kasalukuyan. Ginahasa ng isang sundalo sa Sorsogon ang isang 15 anyos na dalagita. Si "Chona," (di tunay na pangalan), ay pitong beses na ginahasa ni Pfc. Hamandre Flores, sundalo ng 49th IB at *anchorman* ng Radio PADABA, isang programa ng AFP. Ayon sa ina ng biktima, nilapitan nila si Flores nang malaman nilang taga-Isabela ito para hingin ang tulong nito na hanapin ang tyuhin ni "Chona" na nangmolestya sa kanya. Sa Isabela raw ito nagtatago.

Subalit nang pumunta ang mag-ina sa kampo ng 49th IB sa Juban, Sorsogon, pinabili muna ni Flores ng pagkain ang ina at kapatid ng dalagita. Nang masarili na niya ang dalagita ay tinutukan niya ito ng baril at ginahasa. Sinabihan ang dalagita na huwag magsusumbong at kung hindi ay papatayin siya at ang kanyang pamilya. Naulit pa ito nang pumunta ang sundalo sa

bahay ng dalagita at nakipaginuman ito sa ama ng biktima. Sa ikatlong pagkakataon, sapilitang isinama sa kampo ang biktima at doo'y ilang ulit pang ginahasa.

Nang may kaso nang panggagahasa si Flores, binabaligtad ngayon ng militar ang mga pangyayari at sinasabing ibinubugaw daw ng kanyang ina ang dalagita sa mga sundalo. **AB**

Aquino: Pinakamalaking bugaw ng mga dayuhang kapitalista

Binansagan ng Partido Komunista ng Pilipinas (PKP) si Benigno Aquino III na "pinakamalaking bugaw" para sa interes ng malalaking kapitalista. Ito'y matapos pasinayaan ang programang "Public-Private Partnership" (PPP) sa Marriot Hotel sa Pasay City nitong Nobyembre 18. Sa harap ng 500 manedyer ng mga multinasyunal na korporasyon, ginarantiya niyang di kailanman mailalagay sa alanganin ang koleksyon nila ng mga bayad at patuloy na makapagkakamal ng superganansya ang kanilang mga negosyo sa bansa. Sa gayon, tiyak na walang makapipigil sa talamak na pag-iral ng korapsyon, pang-aabuso at pandarambong sa bansa bunga ng patakarang ito ng administrasyong Aquino.

Habang ibinubugaw ni Aquino ang bansa sa mga dayuhang manedyer, tinutuligsa naman siya ng mga kasapi ng Bayan Muna na nagdaos ng kilos-protesta sa labas ng Marriot Hotel. Ang isang istrimer na may mensaheng "Philippines not for sale!" (Hindi ibinibenta ang Pilipinas!) na kinumpiska ng mga kagawad ng Pasay City Police ay malinaw na pagtutol sa programa ni Aquino na ngayo'y binansagan nang "Privatization King." Inaasahan ng bangkaroteng gubyrerno na kikita ito ng \$3.4 bilyon sakaling mamuhunan ang mga dayuhan sa mga proyektong riles, kalsada at mga paliparan sa bansa.

Ayon sa mga aktibista, ang programang PPP ng rehimeng Aquino ay walang iba kundi "Private-Public Plunder" dahil lalamunin lamang nito ang lahat ng natitirang negosyo at likas na yaman ng bansa sa kapahamakan ng mamamayang Pilipino. Bunsod nito, lolobo pang lalo ang dati nang gahiganteng utang panlabas ng bansa. **AB**

Ka Remedios Daoag (1955-2010)

Huwarang rebolusyonaryo

Si Kasamang Remedios Daoag (Ka RD) ay kabilang sa mga upisyal ng Komiteng Tagapagpaganap ng Panrehiyong Komite ng Partido Komunista ng Pilipinas sa Cagayan Valley. Namatay siya sa isang aksidente noong Setyembre habang naglalakbay patungo sa isang larangan sa Cagayan. Nagpupugay ang buong rebolusyonaryong kilusan kay Ka RD. Isa siyang dakilang bayani ng rebolusyon.

Kinaharap at pinangibabawan ni Ka RD ang maraming kahirapan para makapaglingkod sa mamamayan at rebolusyon. Nakibaka siya sa pyudal na kultura sa kanayunan na nagmamaliit sa kakayahan ng kababaihan. Nagpunyagi siya sa mahigpit na kalagayan sa ilalim ng batas militar at noong madakip siya ng kaaway. Inalpasan niya ang mga sakit tulad ng tuberkulosis, malarya, palyadong tuhod at iba pa. Sa kabila ng maagang pagkakahinto sa paaralan, nagpunyagi siya sa pag-aaral ng mga akda ng mga dakilang gurong Komunista at ginamit ang teorya bilang tanglaw sa praktika.

Lumaki si Ka RD sa mahirap na buhay ng mga setler. Kabilang ang kanilang angkan sa mga minoryang Yogad na lumikas para maghanap ng ibang lupang mabubungkal matapos agawin ang kanilang lupang ninuno sa Echague, Isabela. Napadpad sila sa Dibay, Minuri, Jones, Isabela kung saan nagkainingin ang pamilya ni Ka RD.

Naging aktibista si Ka RD sa baryo. Taong 1972 nang sumapi siya sa Bagong Hukbong Bayan (BHB). Tinakasan niya ang kultura noon ng mga Yogad na pagpili ng magulang ng mapapangasawa ng kanilang anak.

Sinanay si Ka RD bilang medik. Nasabak siya kaagad sa paggagamot nang tamaan ng malarya ang halos buong Coy B noong 1972 hanggang 1973. Maging silang mga medik ay nagkasakit. Nang makaipon ng kaunting lakas, tumulong si Ka RD sa paghahanap ng pagkain at mga katutubong gamot para sa mga pasyente. Isa sa pinakamasisiglang gerilya sa Coy B si Ka RD. Lalo pa siyang napalapit sa masa dahil sa sipag niya sa pag-a-*acupuncture* at iba pang paggagamot sa kanila.

Sa harap ng sustenidong kampanyang panunupil ng kaaway sa Forest Region ng Isabela, at kahinaan ng BHB na mabilis na kumawala sa pagkubkob mula nang ipataw ang batas militar noong Setyembre 1972 hanggang bandang 1976, dumanas ng labis na kahirapan ang Coy B. Inabot ng mahigit isang taon na kumakain lamang sila ng saging, gabi at kamoteng kahoy. Naglakad sila sa gubat na walang suporta ng masa. Sa kabila nito, si Ka RD ay hindi pinanghinaan ng loob at nagpunyagi sa pagiging mandirigma. Namatay ang isinilang niyang sanggol noong panahon ng tinaguriang Long March mula Isabela patungo sa Cagayan noong



1975 para alpasan ang kubkob ng kaaway.

Taong 1976 nang mapabilang siya sa Rehiyunal na Kawanihan sa Edukasyon. Kasama siya sa nagpalaganap ng Saligang Kursong Pampartido na binalangkas sa rehiyon bago pa mabuo ang Batayang Kursong Pampartido.

Naging myembro siya ng kalihiman ng isang distrito sa Cagayan noong 1978. Noong taon ding iyon ay nadakip siya ng kaaway pagkapanganak niya. Mahigit isang taon siyang itinago sa *safe house* ng MIG. Muli siyang nakakilos noong 1980.

Nang muli siyang italaga sa Isabela noong 1983, naging kalihim si Ka RD ng isang larangan. Noong 1995 ay nahalal siya sa kalihiman ng komite ng supraprubinsya ng Isabela-Nueva Vizcaya-Quirino. Ipinagpatuloy niya ang pagganap bilang kalihim ng isang larangan matapos siyang mahalal sa Komiteng Tagapagpaganap ng rehiyon sa kumperensya noong 1999.

Napanday si Ka RD sa lahatang-panig na pamumuno sa Partido. Hindi lamang niya ma-

susing pinag-aaralan ang sitwasyong militar. Kasama rin siya sa mga taktikal na opensiba. Namuno siya sa matatagumpay na kilusang masang antipasista at antipyudal. Pinamunuan niya ang unang matagumpay na pagkilos sa rebolusyong agraryo sa rehiyon na antas bayan ang saklaw. Ito ang hinalawan ng mga aral sa sumunod na mga antas-bayang pakikibakang agraryo sa rehiyon.

Nagdokumento si Ka RD ng mga pagtatasa, paglalagom at panlipunang pagsisiyasat. Sa mga pulong ng kolektibo, matalas niyang iwinasto ang mga maling pag-unawa sa mga batayang prinsipyo sa ideolohiya, pulitika at kaayusang pang-organisasyon. Natuto rin siyang gumamit ng kompyuter sa pagdodokumento at pagkokoda. Taong 2005 nang maging kagawad siyang muli ng Rehiyunal na Kawanihan sa Edukasyon. Isinalin niya ang BKP at ibang mga sulatting Pilipino tungong Iloko.

Malikhain siya. Siya ang nagkomposo ng mga kantang "Ilaban Nagbannugan" (Ipaglaban ang Pinagpaguran), "DRB Itandudo" (DRB Itaguyod) at "Panag-Adal Kasasaad" (Pag-aaral ng Kasaysayan). Iwinawasto niya ang mga maling pagkanta at bigkas sa mga kanta, ma-Pilipino man o ma-Iloko. Lumikha siya ng mga tula na naipalabas sa mga pagtatanghal ng BHB.

Kahit mataas na ang kanyang naging katungkulan, hindi siya nagpabaya sa partisipasyon sa gawaing manwal. Aktibo siya sa mga gawain sa kusina, gumagawa ng balon, nangangahoy at iba pa.

Mga drayber, nagprotesta

Naglunsad ng kilos-protesta ang mga drayber ng *pedicab* at *kuliglig* (*pedicab* na de-motor) sa Maynila noong Nobyembre 15 upang tutulan ang pagbabawal sa kanila na bumyahe sa lunsod. Sinuportahan sila ng mga grupo ng Anakbayan at Kabataan Party.

Ayon sa Alyansa ng Nagkakaisang Pedicab at Kuliglig Drivers (ALNAPEDKU), hindi makatarungan ang utos ni Mayor Alfredo Lim ng Maynila na ipagbawal ang kanilang mga sasakyan dahil libu-libong mga drayber ang mawawalan ng hanapbuhay. Hiniling nila na ibasura ang Executive Order No. 16 at 17 na nagbabawal sa mga drayber ng *kuliglig* at *pedicab* na bumyahe sa mga pangunahing lansangan at haywey sa Maynila.

Iginiit din nila na pahintulutang bumyahe dahil may permiso naman sila sa lokal na pamahalaan. Anila, nakakatulong ang *kuliglig* dahil abot-kaya ang pamasahang nito. Dagdag pa, makakaiwas din ang mga tao sa krimen laluna kapag gabi, kaysa kung maglakad lamang sila. Nakahanda silang iakyat ang kanilang apela kay Benigno Aquino III, ayon sa ALNAPEDKU.

Aabot sa 8,000 drayber ng *pedicab* at *kuliglig* ang tiyak na mawawalan ng trabaho kapag ipinatupad ang pagbabawal sa kanilang sasakyan simula Disyembre 1. AB

Dumanas siya ng malalang depresyon, subalit sa kabila nito'y nanatili siya sa loob ng organisasyon at kumilos nang ayon sa kanyang kakayahan. Bupalik siya sa kanayunan nang maalpasan niya ito. Sa kabila ng mga kahirapan, pinangibabawan niya ang sariling emosyon. Sa halip, nagsikap siyang maging sandigan ng pagkakaisa at boses ng mga kasama.

Si Ka RD ay modelo ng mga ina at asawa. Hinarap niya ang sakripisyong mapawalay sa mahal na tatlong anak para magrebolusyon. Katuwang niya ang asawa sa pagrerebolusyon.

Modelo siya ng kasigasigan sa pag-aaral. Kahit pa di nakatapos ng elementarya sa burgis

na edukasyon, ibinukas niya ang kanyang isip at nagpunyagi sa pag-aaral.

Modelo siya ng kabataang kababaihan. Sinalungat niya ang pyudal na kultura sa kanayunan. Inialay ang kasigasigan ng kanyang kabataan sa paglingkod sa sambayanan. Minulat at nirekrut niya ang kanyang mga kapatid. Modelo rin siya ng mga rebolusyonaryong nagkakaedad. Hindi siya humintong kumilos kahit pa palyado ang kanyang tuhod. Tungkod niya ang rebolusyonaryong simulain.

Modelo siya ng aping sambayanan. Nakibaka siya sa tatlong saligang suliranin ng mamamayang Pilipino hanggang sa huling saglit ng kanyang buhay. AB

Nagkakaisang sigaw: Palayain ang Morong 43!

Patuloy na lumalakas ang panawagan at presyur ng iba't ibang sektor sa loob at labas ng bansa na palayain na ang 43 manggagawang pangkalusugan na inaresto noong Pebrero 6 sa Morong, Rizal. Iginigiit nila ang kagyat na pagpapalaya sa dalawang kapapanganak na ina at kay Dr. Alexis Montes, ang 60 anyos na manggagamot na may sakit at tinortyur. Nagkakaisa ang lahat sa pagtingin na labag sa karapatang-tao ang patuloy na detensyon ng mga inosenteng manggagawang pangkalusugang inakusahang nagsasanay sa paggawa ng mga eksplosibo.

Patuloy na tumatanggi si Benigno Aquino III na iutos ang pagpapalaya sa Morong 43 sa kabila ng kongklusyon ni Justice Secretary Leila de Lima na ilegal ang pag-aresto sa mga biktima. Ipaubaya na lamang daw sa korte ang pagdedesisyon sa kaso.

Lumalawak na internasyunal na suporta. Noong Nobyembre 12, iginiit ng International Federation of Medical Students Association of Brazil (IFMSA-Brazil) na palayain na ang Morong 43.

Nitong Nobyembre 17, naglabas ng resolusyon ang World Association of Community Radio Broadcasters (AMARC, isang pandaigdigang kilusan ng mga nag-oopereyt ng mga pangkomunidad na radyo sa mahigit 110 bansa) na nagpapahayag ng paglahok nito sa pandaigdigang kampanya para sa pagpapalaya sa Morong 43. Binatikos ng AMARC ang anito'y napakairegular na pag-aresto, detensyon, pagtortyur at di makataong pagtrato sa Morong 43. Anito, dapat na silang agad palayain sa konsiderasyong makatao, bukod pa sa konsiderasyong ligal at moral.

Lubos ding nakiisa sa panawagan ang mga delegado sa International Conference on Solidarity, Defense and Struggle for Freedom of Political Prisoners in

the World nang idaos ito noong Oktubre 22-24 sa Copenhagen, Denmark. Dumalo rito ang mga delegado mula sa siyam na bansa. Nanawagan din silang itigil na ng rehimeng Aquino ang mga ekstrahudisyal na pamamaslang.

Bago ito, nanawagan din kay Aquino ang HALDANE Society of Socialist Lawyers at mga kasamahan nito sa International Association of Democratic Lawyers na kagyat na palayain ang Morong 43. Ang mga upisyal ng HALDANE ay dumalo sa Fifth Conference of Lawyers of the Asia Pacific sa Maynila. Binisita nila ang mga detenido noong Setyembre 20. **AB**

7 armas, nasamsam ng BHB sa Davao del Sur

Dalawang ripleng awtomatik, isang pistolang 9 mm at apat na *shotgun* ang nakumpiska ng isang yunit ng Bagong Hukbong Bayan (BHB) sa ilalim ng Valentin Palamine Regional Operational Command (VPROC-BHB) nang salakayin nito ang isang yunit ng CAFGU at CVO noong madaling araw ng Nobyembre 10 sa Barangay Upper Bala, bayan ng Magsaysay, Davao del Sur.

Dinisarmahan ng mga Pulang mandirigma ang mga elemento ng CAFGU at CVO para hindi sila magamit na instrumento sa malupit na pananalasa ng 39th IB sa mga komunidad. Walang nasaktan sa magkabilang panig sa reyd na ito.

Ang operasyong ito ay bahagi ng pagpapairal ng kapayapaan at kaayusan sa mga teritoryong kinikilusan ng BHB sa Far South Mindanao Region (FSMR), ayon kay Ka Dencio Madrigal, tagapagsalita ng VPROC-BHB.

Nag-umpisa ang matitinding pananalasa ng mga tropa ng 39th IB sa mga komunidad nitong kalagitnaan ng taon. Layunin ng 39th IB na hawanin ang daan para sa agresibong pagpapalawak ng mga korporasyong multinasyunal tulad ng Dole Stanfilco. Maraming magsasaka ang mawawalan ng kanilang kabuhayan kung lubusang makokontrol ng mga dayuhang kumpanyang ito ang mas malawak na lupain para sa kanilang mga plantasyon ng saging at pinyang pang-eksport. **AB**

Kasinungalingan ng militar, binatikos ng NDF-Negros

Mariing binatikos ni Ka Frank Fernandez, tagapagsalita ng National Democratic Front (NDF) sa Negros ang paratang ng hepe ng 303rd Infantry Brigade na si Col. Jonas Sumagaysay na ginawang mga pananggalang ng Bagong Hukbong Bayan (BHB) ang mga tagabaryo, guro at estudyante para makaiwas sa pagtugis ng mga sundalo noong Oktubre 21. Nangyari umano ito matapos tambangan ng BHB ang 1st Scout Ranger Company sa Sityo Odiongan, Barangay Tabun-ac, Toboso, Negros Occidental.

Ani Fernandez, malaon nang sinusubaybayan ng mga upisyal ng Roselyn "Jean" Pelle Command (RPC) ang inilulunsad na malawakan at sustenidong kampanyang militar sa lugar. Ang mga nag-ooperasyong tropa ay nasa ilalim ng 303rd Brigade, 62nd IB, 1st Scout Ranger Company (1st SRC), at 6th Regional Public Safety Management Battalion ng PNP. Kasama nila bilang paramilitar na pwersa ang bandidong grupong Revolutionary Proletarian Army (RPA).

Maaga pa lamang noong Oktubre 21 ay naabisuhan na ang kumand ng RPC-BHB na nakapasok na ang isang kolum ng militar sa perimetro ng Sityo Odiongan kung saan pansamantala silang nakahimpil. Mabilis na nakaposisyon ang mga Pulang mandirigma at tinambangan ang yunit ng 1st SRC. Dalawang sundalo ang napatay at lima ang nasugatan. Pagkaraan ng pitong minutong putukan at maniobra, organisadong nakaatras ang BHB sa rutang matagal nang nahanda at malayo sa sentro ng baryo at paaralan. Taliwas ito sa mga paratang ni Colonel Sumagaysay. Sa bahagi naman ng kaway, isinakay nila ang kanilang

mga kaswalti sa dumating na helikopter at inilipad sila sa direksyon ng Cebu.

Ayon kay Ka Frank, gumawa si Sumagaysay ng kagila-gilalas at bulaang kwento ng sagupaan para sirain ang prestihiyo ng rebolusyonaryong kilusan at tabunan ang kanilang mga kabiguan at kahihiyan sa pulitika at militar. Sa kabila ng todo-buhos ng tropa at kagamitang militar, bigo ang Central Command ng AFP-Visayas sa kanilang target na paliitin at pahinain ang mga pwersa ng BHB at rebolusyonaryong kilusan sa Negros.

Iniulat ng NDF-Negros na patuloy na lumalaki at lumalakas ang mga pwersa ng BHB sa isla. Nakapaglunsad ito ng 25 taktikal na opensiba laban sa Philippine Army, PNP at pwersang paramilitar ng guberno at mga asyendero't kumprador negosyante mula Enero hanggang Oktubre 2010. Nakasamsam sila ng mahigit 50 iba't ibang kalibreng armas. Mahigit 20 sundalo ng Philippine Army ang napatay sa mga labanan.

Kinakaharap din ngayon ng mga reaksyunaryong militar ang lumalakas na pampulitikang kilusan ng mamamayan laban sa militarisasyon. Bunsod ng pagkakabunyag ng mga krimen ng 62nd IB tulad ng pagpaslang sa lider ng Bayan Muna sa Hima-maylan City na si Benjamin Bayles, ibinalik ang naturang batalyon sa 3rd ID sa Camp Jamin-dan, Capiz. Pinalitan din ang ilang mga upisyal nito na sangkot sa mga ekstrahudisyal na pamamaslang at iba pang mga paglabag sa karapatang-tao. **AB**

Iligal na pagmimina at pagtotroso sa Agusan del Sur, tinututulan

Mahigit 2,000 residente ng San Francisco, Agusan del Sur ang sama-samang nagralli at naglunsad ng karaban noong Nobyembre 13 para ipahayag ang kanilang mahigpit na pagkudena at pagtutol sa ilegal na pagmimina at pagtotroso.

Mariin nilang panawagan na itigil ang operasyon ng pagtotroso at pagmimina sa kanilang lugar lalong-lalo na sa saklaw ng protektadong *watershed area* ng lokal na kumpanya sa tubig sa lugar. Dinaluhan ang pagkilos na ito ng mga Lumad, taong-simbahan, mga empleyado ng kumpanya sa tubig, mga kasapi ng Integrated Bar of the Philippines (IBP) sa prubinsya at iba pang sektor na nagmamalasakit sa kalikasan. **AB**

Ikaanim na anibersaryo ng Masaker sa Hacienda Luisita, ginunita

Isang karaban ng mga sasakyan ang tumungo sa Tarlac City noong Nobyembre 17 bilang paggunita sa ikaanim na anibersaryo ng Masaker sa Hacienda Luisita. Umabot sa 40 sasakyan ang nagsimula sa Quezon City Memorial Circle noong araw na iyon. Sa Maynila, nagkaroon ng kaparehong kilos-protesta ang Kilusang Mayo Uno (KMU) sa Tulay ng Mendiola.

Ang naturang karaban ay inorganisa ng Unyon ng mga Manggagawa sa Agrikultura (UMA), KMP at ng Bagong Alyansang Makabayan. Kasabay ng paggunita, hiniling din nila sa Senado at Mababang Kapulungan na muling imbestigahan ang naganap na masaker sa loob ng 6,435-ektaryang asyenda.

Maaalalang pito ang napatay at mahigit 100 ang nasugatan nang pagbabarilin ng mga pwersa ng Philippine Army, PNP at mga paramilitar ang mga welgista na nasa tapat ng tarangkahan ng asyenda noong Nobyembre 16, 2004. Marami pa ang pinatay na mga welgista at mga alyado nila pagkatapos ng madugong insidenteng ito.

Nagsampa ng mga kasong kriminal ang mga kamag-anak ng mga biktima sa Office of the Ombudsman noong 2004. Kabilang sa mga sinampahan ay ang dating pangulo ng bansa na si Gloria Macapagal-Arroyo; Patricia Sto. Tomas na kalihim noon ng Department of Labor and Employment (DOLE); Jose "Peping" Cojuangco; at Benigno Aquino III (na ngayon ay pangulo ng bansa). Ibinasura ng Ombudsman noong 2005 ang isinampang mga kasong kriminal.

Bunsod ng mga maniobra ng mga nasa poder at personal na interes sa Hacienda Luisita ng

mga dayuhang mamumuhunan, lalong lumalakas ang pagsigaw ng hustisya ng mga kamag-anak, kababayan at mga kaibigan ng mga biktima. Hanggang ngayon, ang mga elemento ng militar at pulisya na nasangkot sa madugong insidente ay hindi pa rin napananagot. **AB**

Bagong oplan ng AFP, walang pinag-iba sa dati—PKP

Walang magiging kaibhan ang bagong *internal security operational plan* (oplan) ng Armed Forces of the Philippines (AFP) sa Oplan Bantay Laya. Ito ang reaksiyon ng Partido Komunista ng Pilipinas (PKP) sa anunsyo ng AFP nitong Nobyembre 20 na ang bagong buong oplan nito ay magsasaalang-alang sa karapatang-tao.

Anang PKP, imposible para sa AFP na mag-isip ng kontra-rebolusyonaryong gerang kakabig sa suporta ng mamamayan dahil ang saligang layunin nito ay ipagtanggol ang bulok na naghaharing sistema sa pamamagitan ng pagsupil sa pakikipaglaban para sa pambansa at panlipunang kalayaan.

Inihalimbawa ng Partido ang katatapos lamang na pagpaslang ng AFP sa syentistang si Leonardo Co at dalawa niyang kasamahan. Patuloy na nagpapalusot dito ang AFP sa kabila ng mga patunay na sila ay nagkasala. Anang PKP, malinaw na hindi kaya ng AFP na tingnan ang sarili nito sa salamin para mareporma nito ang sarili. Kaya kapag sinasabi ng mga heneral ng AFP na pinahuhusay nila ang mga alituntunin sa pakikipaglaban at nagbibigay-pansin sa karapatang-tao, puro satsat lamang ito.

Kinwestyon din ng PKP kung bakit alinsunod sa kanilang oplan ay ang AFP ang magmomobilisa sa mga lokal na guberno, sibilyang ahensya at NGO. Anito, lumalabas na ang mga islogan sa *counterinsurgency* tulad ng "mahusay na pangguguberno," "pagtataguyod ng kapayapaan" at "lahatang-panig na pamamaraan" ay palamuti lamang sa pangunahing layunin ng AFP na gumamit ng lantarang pasismo para supilin ang armadong rebolusyon ng mamamayan. **AB**



Pulong ng G20, sinalubong ng kilos-protesta

Sinalubong ng kilos-protesta ng ilampung libong Koreano ang pulong ng G20 sa Seoul, South Korea noong Nobyembre 7.

Umabot sa 40,000 myembro ng mga unyon ng manggagawa, mga estudyante at aktibista ang naglunsad ng martsa-rali sa Seoul, kabisera ng South Korea. Dinaluhan ito ng ilang dayuhang aktibista mula sa iba't ibang bansa. Daan-daang aktibista naman, kabilang yaong nagmula sa Pilipinas ang hinarang sa erport at pinauwi. Ang kilos-protesta ay pinamunuan ng Korean Confederation of Trade Unions na mayroong 600,000 myembro.

Nanawagan sila ng alternatibong solusyon sa pandaigdigang krisis sa ekonomya at iba pang problema ng mundo. Binatikos nila ang nakasalang na kasunduan sa "malayang kalakalan" sa pagitan ng South Korea at US.

Tinuligsa rin ng mga raliyista ang anti-demokratikong hakbang ng guberno sa pagharang ng mga dayuhang aktibista na nais dumalo. Kabilang sa mga pinagbawalang pumasok sa South Korea sina Sonny Africa, *chief researcher* ng Ibon Foundation; Paul Quintos, isa ring kawani ng Ibon Foundation; Roger Soluta, pangkalahatang kalihim ng Kilusang Mayo Uno (KMU); at ang makabayang makata at mang-aawit na si Jess Santiago.

Para proteksyunan ang 25 pinuno ng mga estado, mga upisyal ng IMF at World Bank at ilang bilyunaryong negosyante

na nagsidalo sa naturang pulong, gumamit ang guberno ng Seoul ng 45,000 *armored riot police* at itinaas ang alerto ng buong armadong sandatahan nito. Gumamit ito ng *pepper spray* para sapilitang buwagin ang hanay ng mga demonstrador.

Ang mga aksyong protesta sa Seoul ay ilan lamang sa mga aktibidad ng tinaguriang Isang Linggong Kolektibong Aksyon

ng Mamamayan laban sa G20 na inilunsad noong Nobyembre 7-13. Ginunita sa naturang aktibidad ang ika-40 anibersaryo ng pagkamatay noong Nobyembre 13, 1970 ni Jeon Tae-il, isang 22 anyos na manggagawa sa pabrika ng tela. Nagpakamatay siya para iprotesta ang sahod-alipin, kawalan ng mga benepisyo at iba pang kalunus-lunos na kalagayan sa paggawa ng mara-ming manggagawa at ang pagiging manhid ng reaksyunaryong guberno rito. **AB**


Mas malalaking letra, mas mahabang papel

Bilang tugon sa kahilingan ng mga mambabasa ng *Ang Bayan* mula sa iba't ibang dako ng bansa, ilang pagbabago sa disenyo ng pahayagan ang sinisimulan ngayong ipatupad.

Inyong mapapansin simula sa isyung ito ang pinalaking mga letra para gawing mas magaan sa mata ng nakararaming mambabasa. Ginawang 12 mula sa dating 11 *points* ang laki ng mga letra.

Patuloy na pinag-aaralan ang mga maaari pang gawing pagbabago hindi lamang para mas madaling basahin kundi para maging higit ding kawili-wili ang anyo ng ating pahayagan. Simula sa ispesyal na isyu para sa ika-42 anibersaryo ng Partido sa Disyembre 26, ang *layout* ng *Ang Bayan* ay gagawin na para sa mahabang papel (8.5" x 13") mula sa kasalukuyang 8.5" x 11". Mungkahing isaalang-alang ito ng mga kinauukulang organo at yunit sa paghahanda ng materyales para sa reproduksyon.

Hinihiling din ang patuloy ninyong pagpapaabot ng mga mungkahi para sa ikauunlad ng *Ang Bayan*. **AB**



**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 22
Nobyembre 21, 2010
www.philippinerevolution.net

Editorial

Ang pakikibaka sa PAL at paglaban ng mga manggagawang Pilipino

Makatarungan para sa mga manggagawa ng Philippine Air Lines (PAL) na puspulang labanan ang planong sipain ang halos 3,000 regular na manggagawa sa kumpanya at palitan sila ng mga de-ahensyang manggagawang kontraktwal. Ang pakikibaka laban sa iskemang

ito ng *outsourcing* (pagkokontrata ng trabaho sa labas ng kumpanya) ay malawak at lubos na sinusuportahan ng uring manggagawa at masang anakpawis.

Hindi lamang ang kabuhayan ng mga manggagawa ng PAL at kanilang mga pamilya ang naka-

salalay sa pakikibakang ito. Lalupa't kinatigan ng Department of Labor and Employment (DOLE) ang mga balak ng PAL, asahang lalo pang lalakas ang loob ng malalaking kapitalista na pag-ibayuhin ang sistema ng *outsourcing*.

Nakadugtong ang pakikibakang ito sa laban ng mga manggagawa sa patakaran ng "pleksibilisasyon" ng paggawa na ipinataw ng imperyalismo noon pang dekada 1990. Nitong nakaraang dalawang dekada, tuluy-tuloy na sumidhi ang pagsasamantala sa mga manggagawang Pilipino sa pamamagitan ng iba't ibang anyo ng "pleksibilisasyon" ng paggawa, katulad ng kaswalisasyon at kontraktwalisasyon at ng ngayo'y luma-



**Mga tampok sa
isyung ito...**

Napipintong welga sa
PAL

PAHINA 3

Kilalang syentista,
pinatay ng militar sa
Leyte

PAHINA 7

Mga pagbabago sa
disenyo ng *Ang Bayan*

PAHINA 14

Mga tuntunin sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com